

# RELACION

## PËR

### **PROJEKTLIGJIN “PËR RATIFIKIMIN E PROTOKOLLIT TË TRAKTATIT TË ATLANTIKUT VERIOR PËR ADERIMIN E REPUBLIKËS SË MAQEDONISË SË VERIUT”**

#### **I. QËLLIMI I PROJEKTAKTIT DHE OBJEKTIVAT QË SYNOHEN TË ARRIHEN**

Projektligji synon ratifikimin e protokollit të Traktati i Atlantikut të Veriut për aderimin e Republikës së Maqedonisë së Veriut, nënshkruar më 6.2.2019, në Bruksel. Traktati i Atlantikut Verior, si dokumenti kryesor themelues i NATO-s, në nenin 10 të tij parashikon mënyrën e anëtarësimit të vendeve të reja në këtë Aleancë. Ky nen parashikon në mënyrë të qartë se vendimi për anëtarësimin e shteteve të reja merret me unanimitet nga ana e shteteve anëtare.

Vendet anëtare të NATO-s vendosën në takimin e krerëve të shteteve dhe qeverive të vendeve anëtare të Aleancës, të mbajtur më 11-12 korrik 2018 që t'i akordojnë Republikës së Maqedonisë së Veriut ftesën për t'u anëtarësuar në NATO.

Kjo ftesë erdhi në vlerësim të vullnetit të vazhdueshëm politik të Republikës së Maqedonisë së Veriut për t'u anëtarësuar në NATO, reformave të ndërmarra nga ky vend në rrugën drejtë anëtarësimit, angazhimit të këtij vendi për përballimin e sfidave të sigurisë si dhe angazhimi për të përfunduar marrëveshjen historike lidhur me emrin, ndërmjet Athinës dhe Shkupit.

Më konkretisht, ftesa për anëtarësim për vendin fqinj pason rotacionin politik në vendin fqinj dhe kryesisht arritja e marrëveshjes së Prespës për çështjen e emrit me Greqinë. Këto elemente të rëndësishme i shtynë vendet anëtare të NATO-s që në takimin e lartpërmendur të krerëve të shteteve dhe qeverive të vendeve anëtare të Aleancës, që në zbatim të të ashtuquajturit kusht i Bukureshtit (i vendosur nga aleatët në Samitin e Bukureshtit dhjetë vite më parë) dhe që shprehimisht thotë se **“kemi rënë dakord që ftesa për ish-Republikën Jugosllave të Maqedonisë të jepet porsa një zgjedhje bashkërisht e pranuar për çështjen e emrit të jetë gjetur”**, t'i jepnin vendit fqinj ftesën për t'u anëtarësuar në NATO.

Për këtë qëllim dhe sipas procedurës përkatëse të NATO-s në rastet e zgjerimit të Aleancës Atlantike, Zyra Ligjore e Sekretarit të Përgjithshëm të NATO-s hartoi protokollin mbi anëtarësimin e Maqedonisë së Veriut në NATO, i cili u është shpërndarë vendeve anëtare të NATO-s për ndjekjen e procedurave të brendshme para nënshkrimit. Protokollet e anëtarësimit, nga pikëpamja ligjore,

konsiderohen protokolle shtesë të Traktatit të Atlantikut të Veriut (Traktat i Uashingtonit, 4 prill 1949).

Nënshkrimi i këtij protokollit, më 6 shkurt 2019 nga të plotfuqishmit e 29 vendeve anëtare në NATO dhe ratifikimi nga parlamentet e tyre, si dhe Parlamenti i Republikës së Maqedonisë së Veriut do të mundësojë pranimin e Republikës së Maqedonisë së Veriut në Traktatin e Atlantikut të Veriut, duke e bërë kështu Maqedoninë e Veriut anëtarin e 30-të të NATO-s.

Projektligji paraqitet të shqyrtohet dhe të miratohet me procedurë të përsheptuar, sipas vullnetit të shprehur nga të gjitha vendet anëtare të Aleancës. Vendi ynë do t'i kryejë procedurat dhe do të jetë në koherencë me të gjitha këto vende.

## **II. VLERËSIMI I PROJEKTAKTIT NË RAPORT ME PROGRAMIN POLITIK TË KËSHILLIT TË MINISTRAVE, ME PROGRAMIN ANALITIK TË AKTEVE DHE DOKUMENTE TË TJERA POLITIKE**

Ky projektligj është i parashikuar në programin analitik të Këshillit të Ministrave për vitin 2019 dhe është në përputhje me programin e qeverisë dhe angazhimet si vend anëtar i NATO-s.

## **III. ARGUMENTIMI I PROJEKTAKTIT LIDHUR ME PËRPARËSITË, PROBLEMATIKAT, EFEKTET E PRITSHME**

Miratimi i këtij projektligji me synim ratifikimin e protokollit të anëtarësimit të Republikës së Maqedonisë së Veriut në NATO, në aspektin politik, është në zbatim të plotë të politikës së NATO-s të “Dyerve të hapura” dhe gjithashtu përbën një shembull të qartë të parimit politik demokratik se çdo shtet sovran ka të drejtën e pakundërshtueshme për të zgjedhur në mënyrë të lirë aleancat e veta.

Në aspektin institucional vlen të theksohet se Republika e Maqedonisë së Veriut ka bërë një rrugë relativisht të gjatë drejt anëtarësimit në NATO. Kështu, përpjekjet institucionale të Republikës së Maqedonisë së Veriut për të arritur anëtarësimin në NATO filluan me anëtarësimin në nismën e partneritetit për paqe (PfP) më 15 nëntor 1995.

Në atë kohë, ish-Republika Jugosllave e Maqedonisë u pranua gjithashtu në Këshillin e Bashkëpunimit të Atlantikut të Veriut (NACC), i pasuar në vitin 1997 nga Këshilli i Partneritetit Euroatlantik (EAPC). Më 14 qershor 1996 në Shkup u hap Zyra për Ndërlidhje e NATO-s dhe në fund të vitit 1997 u hap në Selinë e NATO-s Misioni i Përhershëm i ish-Republikës Jugosllave të Maqedonisë. Në prill të vitit 1999, në Samitin e NATO-s në Uashington, ish-Republikës Jugosllave të Maqedonisë iu dha statusi i vendit kandidat për

anëtarësim dhe që prej asaj kohe filloi pjesëmarrja e vendit në planin e veprimit për anëtarësim (MAP). Republika e Maqedonisë së Veriut ka kryer deri tani më shumë cikle të këtij plani se çdo anëtar i ri i NATO-s që prej vitit 2009 dhe është vlerësuar pozitivisht nga vendet aleate për pjesëmarrjen e saj në misionet ndërkombëtare të paqeruajtjes, duke filluar që prej vitit 2002 me Misionin e ISAF në Afganistan si dhe në vitin 2006 në misionin e BE-së “ALTHEA”, në Bosnjë dhe Hercegovinë.

Në rrafshin e sigurisë, ky anëtarësim ndikon drejtpërsëdrejti në rritjen e sigurisë në hapësirën euroatlantike dhe në rajonin e Ballkanit Perëndimor. Anëtarësimi i Republikës së Maqedonisë së Veriut në NATO redukton më tej influencën e fuqive të treta në rajonin tonë dhe ndikon ndjeshëm në forcimin e marrëdhënieve të fqinjësisë së mirë.

Siç kanë bërë të qarta vendet anëtare të NATO-s, procesi i reformave në Republikën e Maqedonisë së Veriut duhet të vazhdojë jo vetëm gjatë periudhës së anëtarësimit por edhe më pas. Ky është një proces në vazhdimësi që synon bërjen shtet anëtar i NATO-s me aftësi të plota. Vendet aleate kanë bërë gjithashtu të ditur se dëshirojnë të shohin përparim në lëmin e reformave në sektorin e inteligjencës dhe sigurisë, sundimit të shtetit ligjor, pavarësisë së gjyqësorit dhe aftësive mbrojtëse të vendit.

#### **IV. VLERËSIMI I LIGJSHMËRISË, KUSHTETUTSHMËRISË DHE HARMONIZIMI ME LEGJISLACIONIN NË FUQI VENDAS E NDËRKOMBËTAR**

Ky projektligj është në përputhje me Kushtetutën e Republikës së Shqipërisë dhe legjislacion shqiptar.

#### **V. VLERËSIMI I SHKALLËS SË PËRAFRIMIT ME ACQUIS COMMUNAUTAIRE (PËR PROJEKTAKTET NORMATIVE)**

Ky projektligj nuk përafron ndonjë akt të BE-së.

#### **VI. PËRMBLEDHJE SHPJEGUESE E PËRMBAJTJES SË PROJEKTAKTIT**

Nëpërmjet këtij projektligji propozohet ratifikimi i protokollit të Traktatit të Atlantikut të Veriut për aderimin e Republikës së Maqedonisë së Veriut. Republika e Shqipërisë shpreh pëlqimin, ashtu si edhe vendet e tjera anëtare të NATO-s, dhe konfirmon bindjen se anëtarësimi i Republikës Maqedonisë së Veriut në NATO i shërben konsolidimit të mëtejshëm të sigurisë në hapësirën e Atlantikut të Veriut.

Paraqitja në Kuvendin e Republikës së Shqipërisë të këtij protokolli për ratifikim vjen në zbatim të nenit 17, të ligjit nr.43/2016, “Për marrëveshjet ndërkombëtare të Republikës së Shqipërisë”.

Me hyrjen në fuqi të këtij protokolli nga të gjitha vendet anëtare, Sekretari i Përgjithshëm i NATO-s i komunikon qeverisë së Republikës së Maqedonisë së Veriut ftesën për t’u pranuar në Traktatin e Atlantikut të Veriut. Në përputhje me nenin 10 të Traktatit Republika e Maqedonisë së Veriut do të bëhet palë në të, kur të depozitohet instrumentin e anëtarësimit në qeverinë e Shteteve të Bashkuara të Amerikës, që është depozituese e Traktatit.

Protokolli do të hyjë në fuqi kur secila nga palët e Traktatit të Atlantikut të Veriut të ketë njoftuar për vendimin e marrë qeverinë e Shteteve të Bashkuara të Amerikës. Për Republikën e Shqipërisë kjo procedurë do të ndiqet pas hyrjes në fuqi të ligjit të ratifikimit të këtij protokolli. Qeveria e Shteteve të Bashkuara njofton të gjitha palët në Traktatin e Atlantikut të Veriut për datën e hyrjes në fuqi të protokollit.

## **VII. INSTITUCIONET DHE ORGANET QË NGARKOHEN PËR ZBATIMIN E PROJEKTAKTIT**

Institucionet që ngarkohen për zbatimin e këtij projektligji janë Ministria për Evropën dhe Punët e Jashtme në bashkëpunim me Ministrinë e Mbrojtjes.

## **VIII. PERSONAT DHE INSTITUCIONET QË KANË KONTRIBUAR NË HARTIMIN E PROJEKTAKTIT**

Në hartimin e këtij projektligji kanë kontribuar ekspertë të Ministrisë për Evropën dhe Punët e Jashtme.

## **IX. RAPORTI I VLERËSIMIT TË TË ARDHURAVE DHE SHPENZIMEVE BUXHETORE**

Ky projektligj nuk sjell shpenzime buxhetore.

## **KËSHILLI I MINISTRAVE**